

Supervizor za Brčko Roderick Moore suspendirao svoje funkcije

Ambasador Roderick Moore danas je suspendirao svoje funkcije u svojstvu supervizora za Brčko Distrikt, u skladu s odlukom koju je najavio nakon konsultacija s Upravnim odborom Vijeća za provedbu mira od 23. maja 2012. godine. Režim supervizije za Brčko Distrikt bio je na snazi od 14. februara 1997. godine.

Supervizor je svim građanima Brčkog uputio pismo u kojem objašnjava da on, od danas, više ne namjerava intervenirati u radu Distrikta niti će donositi obavezujuće odluke ili posredovati prilikom pronalaženja rješenja. Takođe je najavio da je Ured za implementaciju Konačne odluke za Brčko od danas zatvoren. Supervizor je naglasio da je sada na vlastima Brčko Distrikta da preuzmu potpunu odgovornost za rukovođenje Distriktom. „Demokratski izabrane Brčanke i Brčaci, a ne imenovani stranci, preuzet će potpunu odgovornost za rukovođenje Distriktom“, izjavio je ambasador Moore.

Supervizor je istaknuo da je međunarodna zajednica svjesna činjenice da se građani Distrikta i dalje suočavaju s mnogim izazovima, uključujući i siromaštvo, nezaposlenost, korupciju i brojne druge, ali također smatra da su institucije Distrikta sada sposobne da same rade na rješavanju ovih izazova.

Supervizor je naglasio da je zadržan niz mehanizama u cilju zaštite napretka koji je u Brčkom postignut tokom petnaest godina supervizije. Međunarodna zajednica i dalje će ostati aktivno angažirana u Brčkom, naglasio je supervizor, uključujući i neprekidno prisustvo predstavnika EUFOR-a, OSCE-a i Delegacije EU na terenu. Uz to, visoki predstavnik, Arbitražni tribunal i Ustavni sud BiH imaju ovlasti da štite

interese Distrikta i njegovih građana, ukoliko to bude potrebno. Nadalje, ambasador Moore, koji trenutno obavlja funkciju prvog zamjenika visokog predstavnika, zvanično će ostati supervizor sa svim ovlastima definiranim u odlukama Arbitražnog tribunala za Brčko. Međutim, Moore je istaknuo: „Iako i dalje ostajem supervizor s istim ovlastima kao i do sada, očekujem da ubuduće neće biti potrebe da koristim te ovlasti.“

Supervizor je izrazio svoju ogromnu zahvalnost i poštovanje prema aktivnostima njegovih prethodnika i tima koji je dosljedno i profesionalno godinama radio u okviru Ureda za implementaciju Konačne odluke za Brčko. Takođe je zahvalio hiljadama lokalnih partnera i građana u Brčkom koji su u velikoj mjeri doprinijeli uspjehu Distrikta postignutom od završetka rata do danas. Supervizor je rekao da građani Brčkog trebaju biti ponosni na ono što su postigli: „Transformirali ste Brčko. Omogućili ste povratak vaših susjeda njihovim domovima i formiranje multietničkih institucija. Vaša hrabrost, čestitost i tolerancija su u velikoj mjeri promijenili Brčko nabolje tokom proteklih petnaest godina.“

Supervizor Moore pozvao je građane Brčkog da traže od svojih zvaničnika na javnim funkcijama da provode vlast na pošten, transparentan način i u interesu cijeloga grada.

Prije suspendiranja funkcija, supervizor je danas donio Nalog kojim je na Distrikt prenio pravo da tumači i donosi izmjene i dopune pojedinih pravnih akata koji su proistekli iz naloga prethodnih supervizora. Ovom mjerom tehničke prirode osigurava se da nakon suspenzije neće doći do pravnog vakuuma.